

每週經課朗誦經文(巴克禮漢羅/教羅)2014/05/18

共同經課 - 1

使徒行傳七章五十五節~六十節

55 獨獨司提反 hō 聖神充滿，注目看天，看見上帝 ê 榮光，耶穌 khiā tī 上帝 ê 大 pêng，56 就講，看 ah！我看見天開，人子 khiā tī 上帝 ê 大 pêng。57 In 大聲喉叫，ng 耳孔，同心 oe-khoeh 伊；58 趕伊出城，用石頭 tím 伊；做干證 ê 人將 in ê 衫 hē tī 少年人，名叫掃羅，ê 腳前。59 In 用石頭 tím 司提反；司提反求，講，主耶穌 ah，接納我 ê 神。60 Koh 跪落去，大聲叫，講，主 ah，莫得用 chit-ê 罪歸 tī in。講 soah 就暈。掃羅也歡喜伊死。

共同經課 - 2

詩篇三十一篇一節~五節，十五節~十六節

1 大衛 ê 詩；交 hō 樂官。1) 耶和華 ah，我 oá 靠你，求你 hō 我永永無見笑；照你 ê 公義拯救我。2 求你 aⁿ 耳孔聽我，緊緊來救我；做我堅固 ê 石磐，做拯救我 ê 衛所。3 因為你是我 ê 山巖，我 ê 山寨。所以求你因為你 ê 名來引 chhoā 我，指點我。4 人暗靜張羅網 beh 網我，求你救我脫離；因為你是我 ê 衛所。5 我將我 ê 靈魂交 tī 你 ê 手；耶和華真實 ê 上帝 ah，你有救贖我。15 我 e 遭遇 tī 你 e 手；求你救我脫離我 e 對敵 e 手，以及窘迫我 e 人。16 求你 hō 你 e 面照光你 e 奴僕；照你 e 慈愛拯救我。

共同經課 - 3

彼得前書二章二節~十節

2 就 tiòh 親像 tú-á 生 ê 嬰 á 欣慕神靈專 ê 奶，hō lín tùi 長大到得 tiòh 救。3 Lín 若試 tiòh 知主是慈善，就 tiòh án-ni。4 伊是活石，hō 人棄 sak，但是 hō 上帝揀選珍重，lín 就近伊，5 也親像活石起做神靈 ê 厝，做聖 ê 祭司班，來獻神靈 ê 祭，tùi 耶穌基督能 hō 上帝歡喜接納 ê。6 因為聖經有記載講，看 ah，我用所揀選，所珍重 ê 厝角頭要緊 ê 石，hē tī 郇城。信伊 ê 人不致見笑。7 Án-ni hit-ê 寶貝是歸 tī lín 信 ê 人；但是 tī hiah-ê m̄ 信 ê 人，就起厝 ê 師傅所棄 sak ê 石，成做厝角 ê 頭塊石；8 又 koh，做跋倒人 ê 石，礙 tiòh 人 ê 石磐；in m̄ 順 thàn 道理來跋倒；會到 án-ni，是本定 tiòh teh。9 獨獨 lín 是揀選 ê 族，是王也是祭司，是聖 ê 邦國，是上帝家己 ê 百姓；hō lín 傳報 hit-ê 召 lín 出烏暗，入伊微妙 ê 光 ê ê 好德；10 lín 前 m̄ 是百姓，taⁿ 是上帝 ê 百姓；前無受憐憫，taⁿ 有得 tiòh 憐憫。

共同經課 - 4

約翰福音十四章一節~十四節

1 Lín ê 心莫得擘腹；lín tiòh 信上帝，亦 tiòh 信我。2 Tī 我 ê 父 ê 家，有 choē-choē 厝宅；若無，就我已經 kā lín 講 lah；因為我去，是 kā lín 備辦所在。3 若去 kā lín 備辦所在，就 beh koh 來，接納 lín 歸 tī 我；hō 我所 tī-teh ê，lín 亦 tī hia。4 我所去 ê 所在，lín bat hit 條路。5 多馬 kā 伊講，主 ah，你去 ê 所在，阮都 m̄ 知；thài 會知 hit 條路 ah？6 耶穌 kā 伊講，我就是路，是真理，是活命；若無 tùi 我，就無人就近父。7 Lín 若已經 bat 我，就亦 bat 我 ê 父；taⁿ 了後 lín bat 伊，亦 bat 看見伊。8 腓力 kā 伊講，主 ah，用父 hō 阮看，就夠額。9 耶穌 kā 伊講，腓力，我 kap lín tiàm 到 chiah 久，你 iáu m̄-bat 我 mah？已經看見我 ê，就是看見父；你怎樣講，用父 hō 阮看 ah？10 我 tiàm-tī 父，父亦 tiàm-tī 我，你 m̄ 信 mah？我所 kā lín 講 ê 話，m̄ 是出 tī 家己來講；就是父 toà tī 我來行伊 ê tai-chì。11 我 tiàm-tī 父，父 tiàm-tī 我，lín tiòh 信我；若無，就 tiòh 因為所行 ê 事來信我。12 我實實 kā lín 講，信我 ê 人，我所行 ê，伊 beh 行伊；就比 chiah-ê 事 khah 大 ê，亦 beh 行伊；因為我歸 tī 父。13 Lín tī 我 ê 名，凡所求 ê，我 beh 行伊；hō 父 tī Kiáⁿ 得 tiòh 榮光。14 Lín 若 tī 我 ê 名有所求我 ê，我 beh 行伊。